

說佛告阿難。汝於今者。見此婦女。以金銀瓔珞散我上。阿難白言。唯然已見。此婦女者。於未來世。不墮惡趣。天上人中受諸快樂。過十三劫成佛。號曰金輪瓔珞。廣度眾生。不可限量。是故笑耳。爾時諸比丘聞佛所說。歡喜奉行。

一一四、老母善愛慳貪緣

佛在舍衛國祇樹給孤獨園。時彼城中波斯匿王。后宮嫪女。名曰善愛。年在老邁。極大慳貪。不好惠施。卻坐飲食。時大目連。欲化彼故。著衣持鉢。以神通力。從地踊出。住老母前。從其乞食。老母瞋恚。不肯布施。飲食已訖。有一殘果及洗器水。臭而不噉。爾時目連即從乞索。老母瞋恚。尋即將與。目連得已。踊身虛空。作十八變。時彼老母見是變已。心懷信敬。歸誠懺悔。即於其夜。便取命終。生曠野中。在一樹下。食果飲水。以自存活。致經數時。波斯匿王將諸羣臣。遊獵射戲。馳逐羣鹿。渴乏欲死。遙見彼樹。希望求水。馳奔趣向。去樹不遠。有火炎起。遮不聽近。但遙見人坐其樹下。王即遙問。汝是何人。在此樹下。彼即答言。我

是波斯匿王。后宮嫔女。年在朽邁。名曰善愛。不好惠施。命終生此。唯願大王。慈悲憐愍。為我設供。請佛及僧。使我脫此弊惡之身。王即問言。為汝設福。可得知不。彼人答言。設福必得。王自當見。爾時波斯匿王。聞是語已。敕諸兵眾。相去百步。安置一人。令聲相承。還歸城內。為其設供。請佛及僧。若彼得福。使諸兵眾。各各承聲。須臾聞我。令知虛實。尋即為設。請佛及僧。咒願已竟。彼樹下人。百味飲食。自然在前。彼波斯匿王。已知為實。即於佛前。深生信敬。佛為說法。得須陀洹果。爾時諸比丘。聞佛所說。歡喜奉行。

一一五、含香長者請佛緣

佛在舍衛國祇樹給孤獨園。時彼城中。有一長者。名曰含香。財寶無量。不可稱計。稟性賢柔。敬信三寶。每自思惟。我今此身。及諸財寶。虛偽非真。如水中月。如熱時炎。不可久保。作是念已。往詣佛所。前禮佛足。卻住一面。而白佛言。我欲設供。請佛及僧。唯垂聽許。佛即然可。還歸家中。設諸餽膳。遣使白佛。食具已辦。唯聖知時。爾時世尊。著衣持鉢。將諸比